

## ADDITION DE FACTVM.

Pour Messire Louys de Rieux, pourueu en regale du Prieuré de la Magdelaine du Neufbourg, demandeur en reglement de Iuges.

*Contre Gabriel René de Maillot se pretendant pourueu dudit Benefice & Louys Morant s'en pretendant aussi pourueu comme d'une maladerie deffendeurs.*



EDIT de Rieux ayant esté pourueu en regale dudit Prieuré sur la presentation de Messire Alexandre de Rieux Marquis de Sourdeac seigneur du Neufbourg son Pere & des Curé & habitans dudit lieu, & ledit Maillot par les Vicaires generaux de l'Euesché d'Eureux, le siege Episcopal vacant, sur la presentation du sieur Comte de Crequi & des habitans de sainte Opportune du Bosc, & ledit de Rieux s'estant pourueu au Parlement de Paris, & ledit de Maillot au Parlement de Rouën, ce conflict a donné lieu au reglement de Iuges en question, ou est interuenu ledit Morant pourueu dudit benefice comme d'une maladerie, par le Roy sur la nomination de son grand Aufmonier.

Ledit de Rieux à monstré par ses escritures & par son *Factum* que le Parlement de Paris estoit seul Iuge du differend d'entre les parties, mais comme on a voulu reuoquer en doute si le Roy pouuoit conferer en regale les benefices qui sont en l'institution de l'Euesque sur la presentation de patrons Laïques ou Ecclesiastiques, ledit de Rieux se trouue obligé d'en traiter la question, pour la decision de laquelle il faut obseruer que la regale est ouuerte en vn Euesché à l'instant du deceds de l'Euesque & *succedit Rex loco boni & legitimi administratoris in omni temporalitate dicti Episcopatus con fertque beneficia non curata*, ce sont les termes de l'ordonnan-



ce *dum Episcopus* rapporté par Monsieur le Maistre en son traité des regales chap. 4.

Il résulte de ces termes que le Roy entre au droit de l'Euesque pour donner les benefices non-cures ainsi que l'Euesque faisoit par son droit originaire & primitif auparavant toutes les constitutions du Droit Canon, parce que comme dit M. Charles du Moulin en son commentaire sur le tiltre des fiefs de la Coustume de Paris §. 42. *num. 10. cum istud ius regalie beneficiorum sit longè antiquius iuribus antiquarum decretalium, & libri sexti, & aliarum partium iuris canonici, nullo modo est illi per illa iura canonica derogatum.* Et partant si l'Euesque n'a que le droit de presentation, le Roy ne fera que presenter au benefice vacant, si l'Euesque confere de plain droit le Roy aura le mesme droit, & si l'Euesque n'a que le droit d'institution, le Roy donnera seulement ses Lettres d'institution sur la presentation du Patron.

Probus en ses questions de Regale *quest. 9. num. 4.* decide que si l'Euesque n'a que le droit de presentation à vn benefice, que le Roy n'en pourra disposer, *si non eo modo quo Episcopus, clausa regalia disponderet, videlicet presentando,* & se fonde sur l'Ordonnance du Roy Philippes donnée à Vincennes au mois d'Octobre 1334. par laquelle le Roy dit qu'il a droit de donner les Prebendes, & dignitez, & Benefices vacquans au temps de la Regale des Eglises de son Royaume, le mot donner qui est en ladite Philippine comprenant les mots, presenter, conferer, & instituer. Pour le droit de conferer de plain droit par le Roy ainsi que faisoit l'Euesque avant la Regale ouuerte, il n'a jamais esté reuoké en doute.

Quant au droit d'institution qui appartient au Roy, Ruzée en son traité du droit de Regale *privilegio 8.* en a voulu douter, disant *num. 9. dubitaretur tamen de beneficio spectante ad institutionem Episcopi, an tale beneficium caderet in Regalia,* & ne l'osant resoudre dit *super quo articulo cogitandum est.* La raison pour laquelle il doute, est qu'il argumente par les textes du droit Canon par lesquels les Chapitres des Eglises Cathedrales exercans les Sieges vacquans, la Jurisdiction appartenant aux Euesques, il semble que le droit d'instituer les presentes doiuent appartenir ausdits Chapitres.



Mais il est certain que les droits de la Regale ne se decident pas par les textes de Droit Canon, *cum ius Regaliæ sit antiquius omni jure Canonico* ains *totis constant præiudicatis*. Or les Arrests ont iugé que le Roy succedant au droit del'Euesque *pendente apertura Regaliæ*, Sa Majesté exerce tous les droits del'Euesque en la disposition des benefices non Cures, & plus eminemment quel'Euesque parceque *fungitur vice summi Pontificis*, admettant les resignations en faueur à la reserue de pensions, mesme plus excellemment que le pape, puisque la reigle de *verisimili notitia* qui oblige le Pape, n'a point de lieu en la Regale, & sur le fondement de ces maximes, la question s'estant présentée au parlement pour la Chapelle de S. Nicolas de l'Eglise de Saint Brice de Colchi Diocese de Noyon qui estoit en presentation pour sçauoir si le Roy auroit pû la conferer en Regale, Mr. Seruin aduocat general monstra que le Roy & non pas les Chapitres, *sede vacante*, deuoit instituer les presentes, & le parlement ayant appointé les parties au Conseil adiugea l'estat au Regaliste l'Arrest avec le plaidoyé dudit sieur Seruin est en son recueil de ses plaidoyez le 29. Tome 1.; & depuis cette mesme question s'estant présentée pour vn benefice en patronnage laïcque, elle fut iugée pour le Roy par Arrest donné en l'audiance de la grande Chambre conformement aux conclusions de feu Mr. Bignon aduocat general ce qui se doit entendre de cette sorte que le patron Ecclesiastique ou Laïcque doit adresser sa presentation au Roy comme il auroit fait à l'Euesque, & ne le peut pas faire au Chapitre, tellement que le different d'entre les parties estant de sçauoir lequel a le meilleur droit au benefice en question ou dudit de Rieux pourueu par le Roy *iure Regaliæ* sur la presentation dudit sieur Marquis de Sourdeac Seigneur de Neufbourg & des Curé & habitâs dudit lieu, ou dud. de mailloit pourueu par le Chapitre d'Eureux *sede vacante* sur la presentation dudit sieur Comte de Crequy & des habitans de la parroisse de sainte Opportune du Bosc, & encore ledit de Rieux pourueu par le Roy par la nullité du tiltre dudit de Maillot, il est sans difficulté que la decision de ce different ne peut sinon appartenir audit parlement de Paris.

*Monsieur M O L E Rapporteur.*

